



Bosnia and Herzegovina  
Federation of Bosnia and Herzegovina

**CANTON SARAJEVO**  
Anti-Corruption Office

## **Informacija o provođenju Zakona o prijavljivanju i postupku provjere podataka o imovini nosioca javnih funkcija u Kantonu Sarajevo u 2025. godini**

Sarajevo, 29. decembar 2025. godine

## Sadržaj

|  |    |
|--|----|
| I Uvod .....   | 3  |
| II Cilj Informacije.....                                     | 3  |
| III Nosioci javnih funkcija .....                            | 3  |
| IV Prijave imovine nosioca javnih funkcija .....             | 4  |
| V Izdavanje prekršajnih naloga .....                         | 9  |
| VI Provjera podataka o imovini nosioca javnih funkcija ..... | 10 |
| VII Završna izlaganja.....                                   | 11 |

## I Uvod

Zakonom o prijavljivanju i postupku provjere podataka o imovini nosioca javnih funkcija u Kantonu Sarajevo („Službene novine Kantona Sarajevo“, br. 18/19 i 12/22-u daljem tekstu: Zakon), propisana je nadležnost Ureda za borbu protiv korupcije Kantona Sarajevo (u daljem tekstu: Ured) za provođenje istog, što podrazumijeva ovlaštenje za prikupljanje, provjeru i obradu podataka o imovini nosioca javnih funkcija, te uspostavljanje i vođenje Registra podataka o imovini (u daljem tekstu: Registar). Nosioци javnih funkcija imovinu mogu prijaviti na Obrascu prijave imovine kao i na elektronskom obrascu.

Shodno članu 7. stav (4) Zakona, Ured svakih šest mjeseci podnosi informaciju Skupštini Kantona Sarajevo (u daljem tekstu: Skupština) o poduzetim aktivnostima na provođenju ovog propisa, a što uključuje informacije o radu, prikupljene informacije, uočene nepravilnosti i probleme sa kojima se Ured susreće u ovom procesu.

Skupština prati rad Ureda, razmatra informacije Ureda, te druga pitanja oko provođenja Zakona. U skladu sa navedenim članom Zakona, Skupština se ne smije miješati u rad Ureda, niti tražiti informacije o pojedinačnim slučajevima. Također, za potrebe praćenja nadzora nad Zakonom, Skupština može zatražiti posebne izvještaje o aktivnostima iz nadležnosti Ureda.

Informacije Ured objavljuje na svojoj web stranici, te ih tako čini dostupnim javnosti i svim zainteresovanim stranama.

## II Cilj Informacije

Cilj informacije jeste objedinjavanje svih podataka koji se odnose na provođenje Zakona, u jednom dokumentu, te činjenju istih dostupnim Skupštini kao i svim drugim zainteresovanim stranama za praćenje rada Ureda kroz realizaciju ovog procesa, te osiguravanju mogućnosti istim za predlaganje eventualnih preporuka ili sugestija za poboljšanje ovog procesa.

## III Nosioци javnih funkcija

Shodno zakonskim odredbama, nosiocima javnih funkcija smatraju se:

- a) **Izabrani dužnosnici**, a to su: zastupnici u Skupštini Kantona Sarajevo, vijećnici u Gradskom vijeću Grada Sarajevo i vijećnici u općinskim vijećima općina na teritoriji Kantona Sarajevo.
- b) **Nosioци izvršnih funkcija**, a to su: premijer Kantona Sarajevo i članovi Vlade Kantona Sarajevo, gradonačelnik Grada Sarajevo i općinski načelnici općina na teritoriji Kantona Sarajevo, rektor Univerziteta u Sarajevu, direktori, izvršni direktori, pomoćnici direktora agencija, fondova, javnih preduzeća, javnih ustanova i institucija koji se imenuju ili postavljaju na mandatni period, zamjenici direktora agencija, fondova, javnih preduzeća, javnih ustanova i institucija, predsjednici i članovi skupština javnih preduzeća, punomoćnici Vlade za vršenje ovlaštenja skupštine u javnim preduzećima, predsjednici i članovi nadzornih odbora javnih preduzeća, predsjednici i članovi upravnih i nadzornih odbora agencija, fondova, javnih ustanova i drugih institucija čiji je osnivač Kanton Sarajevo, Grad Sarajevo ili općina na teritoriji Kantona Sarajevo ili u kojima Kanton Sarajevo, Grad Sarajevo ili općina na teritoriji Kantona Sarajevo učestvuje sa više od 50% ukupnog kapitala, kao i druga lica,

koja su izabrana i imenovana, ili je za njihov izbor ili imenovanje data saglasnost od strane Skupštine, Gradskog vijeća, općinskog vijeća, Vlade, Gradonačelnika ili načelnika. Nosiocima izvršnih funkcija smatraju se i vršioci dužnosti prethodno pobrojanih izvršnih funkcija.

- c) **Savjetnici** izabranih dužnosnika i nosioca izvršnih funkcija koji se imenuju po *lex specialis* propisima.

#### IV Prijave imovine nosioca javnih funkcija

Ured je u 2025. godini zaprimio ukupno 2064 prijave imovine nosioca javnih funkcija, po svim osnovama (prilikom preuzimanja dužnosti, godišnje prijavljivanje imovine, poslije završetka dužnosti i na zahtjev Ureda).

Razlog velikog broja zaprimljenih prijava u 2025. godini jeste što je u mnogim institucijama javnog sektora u Kantonu Sarajevo vršen značajan broj imenovanja/razrješenja vršioca dužnosti na period od tri mjeseca. U ovim situacijama imenovani/razrješeni nosioci javnih funkcija imali su obavezu da više puta u toku godine Uredu dostave prijave imovine, a što je uticalo i na podatke o imovini, prihodima i finansijskim obavezama nosioca javnih funkcija, navedenim u nastavku ove Informacije.


Od ukupno 2064 zaprimljenih prijava imovine u 2025. godini, Ured je zaprimio 355 prijava imovine od izabranih dužnosnika, što čini 17,20% od ukupno zaprimljenih prijava. Od nosioca izvršnih funkcija Ured je zaprimio 1704 prijave imovine, što čini 82,56% prijava, dok je 5 savjetnika dostavilo prijavu imovine, što je 0,24% od ukupno pristiglih prijava.

Nosioci javnih funkcija koji su u 2025. godini poslali prijavu imovine su prijavili imovinu i za 1983 bliska srodnika. Po Zakonu bliskim srodnikom smatraju se braćni i vanbraćni drug, dijete, majka, otac, usvojilac i usvojenik nosioca javne funkcije. Nosilac javne funkcije prijavljuje imovinu za bliskog srodnika kada neko od srodnika ima registrovanu imovinu na svoje ime, te njihovu prijavu prilaže uz svoju, na zasebnom Obrascu.

U skladu sa članom 4. Zakona, Ured je u Registru sve nosioce javnih funkcija podijelio na izabrane dužnosnike, nosioce izvršnih funkcija i savjetnike. U nastavku teksta je statistički prikaz podataka o imovini nosioca javnih funkcija, koji su Uredu dostavili prijavu imovine u 2025. godini, sadržani u Registru.

| Nosioci javne funkcije    | Broj nosilaca | Procentualno |
|---------------------------|---------------|--------------|
| Izabrani dužnosnici       | 355           | 17,20%       |
| Nosioci izvršnih funkcija | 1704          | 82,56%       |
| Savjetnici                | 5             | 0,24%        |
| <b>UKUPNO</b>             | <b>2064</b>   | <b>100%</b>  |

**Tabela 1: Prijave imovine nosioca javnih funkcija**



**Grafikon 1: Grafički prikaz prijave imovine nosioca javnih funkcija**

U Registru su podaci o imovini nosioca javnih funkcija kantonalnog, gradskog i općinskog nivoa vlasti na teritoriji Kantona Sarajevo.

Ured je od nosioca javnih funkcija sa kantonalnog nivoa vlasti, u 2025. godini, zaprimio 1603 prijave imovine, što predstavlja 77,67% od ukupno zaprimljenih prijava imovine.

Od nosioca javnih funkcija sa gradskog nivoa vlasti, Ured je zaprimio 53 prijave imovine, što čini 2,56% od ukupno zaprimljenih prijava imovine.

Kada su u pitanju nosioци javnih funkcija sa općinskog nivoa vlasti, Ured je od istih zaprimio 408 prijava imovine, što je 19,77% od ukupno zaprimljenih prijava imovine.

| Nivo vlasti     | Broj nosilaca | Procentualno |
|-----------------|---------------|--------------|
| Kantonalni nivo | 1603          | 77,67%       |
| Gradski nivo    | 53            | 2,56%        |
| Općinski nivo   | 408           | 19,77%       |
| <b>UKUPNO</b>   | <b>2064</b>   | <b>100%</b>  |


**Tabela 2: Prijave imovine nosioca javnih funkcija po nivou vlasti**

## **1. Vrijednost nepokretne imovine nosioca javnih funkcija**

Jedan od podataka koji sadrži prijava imovine nosioca javnih funkcija jeste i podatak o pravu vlasništva na nepokretnim stvarima u zemlji i inostranstvu.

Ured je konstatovao da **ukupna pretpostavljena vrijednost prijavljene nepokretne imovine od 2064 nosioca javnih funkcija i njihovih srodnika, u 2025. godini, iznosi 235.404.995,00 KM.**

Pretpostavljena vrijednost prijavljene nepokretne imovine nosioca izvršnih funkcija iznosi 195.622.516,00 KM ili 83,10%, pretpostavljena vrijednost nepokretne imovine izabranih dužnosnika iznosi 39.441.979,00 KM ili 16,75%, dok pretpostavljena vrijednost prijavljene nepokretne imovine savjetnika iznosi 340.500,00 KM, što je 0,15% pretpostavljene vrijednosti od ukupno prijavljene nepokretne imovine.




*Grafikon 2: Grafički prikaz pretpostavljene vrijednosti nepokretne imovine nosioca javnih funkcija*

## 2. Vrijednost pokretne imovine nosioca javnih funkcija

Prijava imovine nosioca javnih funkcija sadrži i podatke o pravu vlasništva nad pokretnim stvarima koje podliježu registraciji kod nadležnih organa u zemlji i inostranstvu, kao i pravo vlasništva na pokretnim stvarima u vrijednosti većoj od 5.000,00 KM u zemlji i inostranstvu.

**Ukupna vrijednost prijavljene pokretne imovine svih nosioca javnih funkcija i njihovih bliskih srodnika, koji su u 2025. godini dostavili Uredu prijave imovine, iznosi 53.583.317,00 KM.**

Vrijednost prijavljene pokretne imovine nosioca izvršnih funkcija iznosi 42.999.717,00 KM ili 80,25%, vrijednost pokretne imovine izabranih dužnosnika iznosi 10.313.700,00 KM ili 19,25%, dok vrijednost prijavljene pokretne imovine savjetnika iznosi 269.900,00 KM, što je 0,50% vrijednosti od ukupno prijavljene pokretne imovine.



*Grafikon 3: Grafički prikaz vrijednosti pokretne imovine nosioca javnih funkcija*

U Tabeli 3. sadržani su podaci o vrijednosti prijavljene nepokretne i pokretne imovine od 2064 nosioca javnih funkcija i njihovih srodnika, u 2025. godini.


| Vrijednost imovine                   | Izabrani dužnosnici | Nosioci izvršnih funkcija | Savjetnici    | UKUPNO                   |
|--------------------------------------|---------------------|---------------------------|---------------|--------------------------|
| <b>Vrijednost nepokretne imovine</b> | 39.441.979,00 KM    | 195.622.516,00 KM         | 340.500,00 KM | <b>235.404.995,00 KM</b> |
| Procenat                             | 16,75%              | 83,10%                    | 0,15%         | <b>100%</b>              |
| <b>Vrijednost pokretne imovine</b>   | 10.313.700,00 KM    | 42.999.717,00 KM          | 269.900,00 KM | <b>53.583.317,00 KM</b>  |
| Procenat                             | 19,25%              | 80,25%                    | 0,50%         | <b>100%</b>              |

*Tabela 3: Vrijednost nepokretne i pokretne imovine nosioca javnih funkcija*

### 3. Godišnji prihodi nosioca javnih funkcija

Nosioci javnih funkcija u svojoj prijavi imovine obavezni su navesti podatke o izvoru i visini godišnjih novčanih prihoda u zemlji i inostranstvu, s tim što navode iznos i vrstu izvora svakog prihoda. **Ukupni godišnji prihodi nosioca javnih funkcija koji su prijavili imovinu Uredu, u 2025. godini, iznose 73.018.682,00 KM.**

Ured je konstatovao da prihodi nosioca izvršnih funkcija iznose 60.352.094,00 KM ili 82,65%, prihodi izabranih dužnosnika koji su prijavili imovinu iznose 12.514.970,00 KM ili 17,14%, dok prihodi savjetnika iznose 151.618,00 KM, što predstavlja 0,21% ukupno prijavljenih prihoda.




*Grafikon 4: Grafički prikaz godišnjih prihoda nosioca javnih funkcija*

### 4. Finansijske obaveze nosioca javnih funkcija

Nosioci javnih funkcija dužni su prijaviti Uredu finansijske obaveze, tj. dugovanja prema pravnim i fizičkim licima u zemlji i inostranstvu u iznosu većem od 5.000,00 KM. **Ukupan iznos finansijskih obaveza nosioca javnih funkcija iznosi 86.192.523,00 KM**, od čega su 71.707.113,00 KM ili

83,19% su finansijske obaveze nosioca izvršnih funkcija, 14.347.410,00 KM ili 16,65% su obaveze izabranih dužnosnika, dok savjetnici koji su prijavili imovinu u 2025. godini su prijavili finansijske obaveze u iznosu od 138.000,00 KM ili 0,16% od ukupno prijavljenih finansijskih obaveza.



Grafikon 5: Grafički prikaz finansijskih obaveza nosioca javnih funkcija

| Nosioци javne funkcije    | Finansijske obaveze     | Procentualno |
|---------------------------|-------------------------|--------------|
| Izabrani dužnosnici       | 14.347.410,00 KM        | 16,65%       |
| Nosioци izvršnih funkcija | 71.707.113,00 KM        | 83,19%       |
| Savjetnici                | 138.000,00 KM           | 0,16%        |
| <b>UKUPNO</b>             | <b>86.192.523,00 KM</b> | <b>100%</b>  |

Tabela 4: Finansijske obaveze nosioca javnih funkcija

## 5. Načini prijave imovine

Zakon predviđaja da nosioци javnih funkcija u Kantonu Sarajevo prijavu imovine mogu izvršiti na dva načina.

Prvi način je prijavljivanje imovine na Obrascu prijave imovine.

Drugi način je prijava imovine na elektronskom obrascu. Nakon podnošenja zahtjeva za prijavu imovine na elektronskom obrascu, nosilac javne funkcije na svoj e-mail dobija pristupnu šifru za pristup elektronskom obrascu. Novim načinom prijave imovine i unosa podataka o imovini nosioca javnih funkcija u Kantonu Sarajevo uvode se dostignuća informatičkih tehnologija u ovaj proces, te se ovi postupci moderniziraju i čine efikasnijim.

Već ranije je Ured u okviru svog Informacionog sistema razvio web aplikaciju za direktni unos podataka o imovini od strane nosioca javne funkcije.

Ured je izradio posebno uputstvo kojim je detaljno opisan način popunjavanja elektronskog obrasca. Uputstvo je objavljeno u „Službenim novinama Kantona Sarajevo“, broj: 16/22, a dostupno je i na internet stranici Ureda. Kako bi olakšao ovaj inovativni način prijave imovine Ured je izradio i video uputstvo o načinu popunjavanja i dostavljanja elektronskog obrasca prijave imovine, a koje je

dostupno na internet stranici Ureda (<https://www.anticorruptiks.com/sadrzaj/prijava-imovine>), kao link koji se može preuzeti.

Ured je u 2025. godini zaprimio 317 prijava imovine na elektronskom obrascu, dok je 1747 prijava imovine dostavljeno Uredu na Obrascu prijave imovine.


| Način prijave           | Broj nosilaca | Procentualno |
|-------------------------|---------------|--------------|
| Obrazac prijave imovine | 1747          | 84,65%       |
| Elektronski obrazac     | 317           | 15,35%       |
| <b>UKUPNO</b>           | <b>2064</b>   | <b>100%</b>  |

Tabela 5: Način prijave imovine

## V Izdavanje prekršajnih naloga

Ured je nadležan za izdavanje prekršajnog naloga za nosioce javnih funkcija zbog kršenje zakonskih odredbi, i to u slučaju kašnjenja sa godišnjim prijavljivanjem imovine, ako ne prijave imovinu prilikom preuzimanja dužnosti i poslije završetka javne funkcije i ako ne prijave imovinu na zahtjev Ureda.

Rokovi za prijavljivanje imovine propisani su u Zakonu.



Grafikon 6: Grafički prikaz izdatih prekršajnih naloga i postupanje po istim

U toku 2025. godine, Ured je izdao 56 prekršajnih naloga, od kojih su tri lica zbog ponovljenog prekršaja kažnjena sa 3.000 KM, dok je ostalih 53 lica kažnjeno sa 1.000 KM. Od ukupno 56 prekršajnih naloga koje je Ured izrekao u toku 2025. godine, tri naloga su izrečena zbog neprijavljivanja imovine poslije završetka dužnosti ili razrješenja (povreda člana 11. Zakona), 8 naloga je izrečeno zbog neprijavljivanja imovine prilikom preuzimanja dužnosti (povreda člana 9. Zakona), dok preostalih 45 lica je kažnjeno zbog neizvršavanja godišnje prijave imovine (povreda člana 10. Zakona).

Do sada je 20 lica uplatilo novčanu kaznu, od toga 17 lica iznos od 500 KM (50% kazne), a tri lica iznos od 1.020,00 KM (prekoračili rok za plaćanje 50% kazne, te im je izrečena kazna uvećana za 20 KM dodatne takse za naplatu, a u skladu sa članom 58. stav (2) Zakona o prekršajima FBiH). Za dva

lica postupak po prekršajnom nalogu Ureda je vraćen u pređašnje stanje. Dva lica su prekoračila rok za plaćanje 50% kazne, a nisu zatražila sudsko odlučivanje. Preostala 32 lica su zatražila sudsko odlučivanje, od toga za 28 lica čekamo poziv sa Općinskog suda u Sarajevu, dok za četiri lica smo dobili poziv, a usmeni pretres još uvijek nije održan.

| Postupanje po prekršajnom nalogu                                 | Broj lica | Procentualno |
|--|-----------|--------------|
| Platili cijeli iznos novčane kazne uvećan za 20 KM dodatne takse | 3         | 5,36%        |
| Platili 50% novčane kazne  | 17        | 30,35%       |
| Prekoračen rok za plaćanje novčane kazne                         | 2         | 3,57%        |
| Zatražili sudsko odlučivanje po izdatim prekršajnim nalogima     | 32        | 57,15%       |
| Povrat u pređašnje stanje  | 2         | 3,57%        |
| <b>Ukupno</b>  | <b>56</b> | <b>100%</b>  |

*Tabela 6: Postupanje nosioca javnih funkcija po izdatim prekršajni nalozi*

## VI Provjera podataka o imovini nosioca javnih funkcija

Shodno čl. 6. i 18. Zakona, Ured je nadležan da vrši provjeru i kontrolu podataka o imovini nosioca javnih funkcija u Kantonu Sarajevo. Ova provjera obuhvata i provjeru podataka o imovini njihovih bliskih srodnika.

Upravo zbog ove aktivnosti i nadležnosti Ureda u njenom provođenju ovaj zakon ima specifičan značaj i po tome je jedinstven u pravnom prostoru naše države, jer se prvi put u historiji naše države jednim zakonom, kumulativno, propisuje obaveza nosioca javnih funkcija da prijave imovinu i poklone, predviđaju sankcije za neprijavlivanje i vrše provjere podataka o imovini nosioca javnih funkcija.

Uredba o uspostavljanju i vođenju registra ličnih podataka o imovini i postupku provjere imovine nosioca javnih funkcija u Kantonu Sarajevo („Službene novine Kantona Sarajevo“, br. 25/19, 19/22) propisuje obaveza Uredu da u toku svake kalendarske godine izvrši najmanje 100 provjera podataka o imovini i poklonima, izvorima i vrsti prihoda kojim je imovina kupljena, za najmanje 100 nosioca javnih funkcija u Kantonu Sarajevo i njihovih bliskih srodnika.

Provjera imovine se vrši: prikupljanjem i provjerom isprava i dokaza o vlasništvu nad imovinom koja je predmet provjere, njenoj nabavnoj vrijednosti, izvoru i vrsti prihoda kojima je imovina kupljena, provjerom isprava i dokaza o prihodima, rashodima i finansijskim obavezama subjekta provjere i slično.

U cilju izvršenja provjere, ovlašteno lice Ureda se obraća nadležnim institucijama u svrhu pribavljanja potrebnih isprava i dokaza u vezi provjere podataka o imovini navedenih u prijavi i vrši upoređivanje prijavljenih podataka sa relevantnim podacima nadležnih organa vlasti i drugih pravnih lica. Svi organi dužni su da u roku i na način koji odredi Ured, dostave tražene podatke i obavještenja relevantna za provjere imovine nosioca javnih funkcija.

U slučaju kad se provjerom ne utvrdi nesrazmjer između prihoda i imovine, kao i u slučaju da ne postoji osnov sumnje u pogledu istinitosti podataka, sačinjeni izvještaj o provjeri imovine se ulaže u personalni dosje nosioca javne funkcije, a provjera se time smatra okončanom. Ukoliko se provjerom utvrdi nesrazmjer između prihoda i imovine, kao i u slučaju osnova sumnje u istinitosti podataka i zakonitost načina na koji je imovina stečena, Ured o tome obavještava nadležno tužilaštvo, porezne ili druge organe, a ukoliko utvrđena povreda sadrži obilježja krivičnog djela, Ured je dužan sačinjeni izvještaj sa svim prikupljenim ispravama i dokazima bez odlaganja proslijediti na postupanje nadležnom tužilaštvu.

Uredba o uspostavljanju i vođenju registra ličnih podataka o imovini i postupku provjere imovine nosioca javnih funkcija u Kantonu Sarajevo propisuje obavezu Ureda da prije formalnog okončanja



provjere, omogućiti subjektu provjere da se izjasni o svim činjenicama i okolnostima relevantnim za provjeru. S tim u vezi Ured je sve nosioce javnih funkcija čije podatke o imovini je provjeravao, upoznao s provjerom i dao im mogućnost da se izjasne o navodima provjere, bez obzira je li provjerom utvrđen nesrazmjer ili nije. Postupak provjere se završava sačinjavanjem izvještaja o izvršenoj provjeri. Izvještaj sadrži taksativno pobrojane sve aktivnosti Ureda provedene u toku provjere podataka o imovini, podatke o eventualno utvrđenom nesrazmjeru između prijavljene imovine i imovine utvrđene provjerom, sa konkretnim podacima o kakvoj imovini se radi i preporuke za postupanje nakon provedene provjere.

Ured je u 2025. godini pokrenuo 104 postupka provjere imovine nosioca javnih funkcija u Kantonu Sarajevo, od čega je 98 postupaka provjera imovine već okončano. S obzirom da su preostali postupci provjera imovine u završnoj fazi, u kojoj se prikupljena dokumentacija analizira i upoređuje, kompletnu statistiku izvršenih provjera u 2025. godini Ured će objaviti u sljedećoj Informaciji.

U do sada okončanim provjerama nije bilo slučajeva utvrđenog nesrazmjera koji bi imao obilježja krivičnog djela, u smislu člana 20 a. i člana 21. stav (4) Zakona, i nisu povrijeđeni principi i svrha Zakona iz čl. 2. i 3. Zakona.

## VII Završna izlaganja


Zakon propisuje obaveze nosioca javnih funkcija u Kantonu Sarajevo i principe njihovog djelovanja, u vršenju javnih funkcija, posebno ističući principe kao što su: odgovornost, poštenje, savjesnost, otvorenost i vjerodostojnost. Zakonom se uređuje zabrana koruptivnog djelovanja, transparentnost i javna kontrola u obavljanju javnih funkcija. Obaveze i principi koje Zakon propisuje odnosi se na nosioce javnih funkcija, među koje spadaju i nosioci izvršnih funkcija. Upravo je zakonsko definisanje ko se smatra nosiocima izvršnih funkcija, u smislu Zakona, najveći problem u njegovoj provedbi. Zakon ne sadrži preciznu definiciju nosioca izvršnih funkcija, koja bi na nedvojben način propisala krug lica na koja se Zakon odnosi. Zbog ove manjkavosti Zakona nije moguće u potpunosti odrediti na koga se odnose obaveze i principi propisani Zakonom.

Ured je prepoznao ovu manjkavost Zakona i preduzeo niz koraka u otklanjanju iste. Prvi korak je izrada i predlaganje Vladi Kantona Sarajevo Strategije za borbu protiv korupcije Kantona Sarajevo i Akcionog plana, koji sadrže strateško opredjeljenje za uklanjanje uočenih manjkavosti Zakona. Vlada Kantona Sarajevo je Zaključkom broj: 02-04-6476-19/25 od 27.02.2025. godine, usvojila Strategiju za borbu protiv korupcije Kantona Sarajevo 2024. – 2028. i Akcioni plan za provedbu Strategije za borbu protiv korupcije Kantona Sarajevo 2024. – 2028. („Službene novine Kantona Sarajevo“, broj: 10/25). Strateškim ciljem 1. Strategije i Akcionog plana (Unapređenje normativnog okvira za efikasnu prevenciju i borbu protiv korupcije) propisano je da se izvrše izmjene i dopune Zakona, u cilju njegove efikasnije primjene. Tako je Strateškim programom 1.1. (Unapređenje prijave imovine, procesa odlučivanja o sukobu interesa i zaštite prijavitelja korupcije) Akcionog plana kao prva aktivnost predviđeno donošenje Zakona o izmjenama i dopunama Zakona o prijavljivanju i postupku provjere podataka o imovini nosioca javnih funkcija u Kantonu Sarajevo. Ured je izradio Inicijativu za izmjene i dopune Zakona o prijavljivanju i postupku provjere podataka o imovini nosioca javnih funkcija u Kantonu Sarajevo, koja sadrži predloženi tekst izmjene i dopune ovog propisa. Navedene izmjene i dopune Zakona, ukoliko budu usvojene u predloženoj formi i stupe na snagu, sadrže preciznu definiciju nosioca izvršnih funkcija na koje se Zakon odnosi.

Ove izmjene i dopune Zakona, koje je Ured pripremio, sadrže taksativno pobrojano ko se smatra nosiocem izvršne funkcije. Ured će u narednom periodu uputiti Inicijativu za izmjene i dopune Zakona Ministarstvu pravde i uprave Kantona Sarajevo, u skladu sa Strategijom i Akcionim planom.

Najbolji efekti u provedbi Zakona postižu se kad su njegove odredbe jasne i precizne, adresati određeni i ne postoje dileme u primjeni tog propisa. Ovakvim antikoruptivnim propisima postiže se efekat generalne i specijalne prevencije, kad je riječ o pojavi koruptivnih radnji.

Broj: 20-02-89-1690/25 AK  
Sarajevo, 29.12.2025. godine



**ŠEF UREDA**

Erduan Kafedžić